



POLELO EA MOOKAMELI OA SETSI SA POKELLO EA LEKHETHO (LRA) NEHELANONG EA MEAHO EA SEKOLO, LIQOABING SEBAKENG SA ROTHE, KA LA 5 PHUPTJANE 2015.

Motsamaisi oa tšebeletso, ntumelle ka uena ke ise hlompho ea ka ho:

Motlotlehi Khosi;

Mohlomphehi Tona-Kholo ea 'Musu oa Motlotlehi;

Bahlomphehi matona a khabane a 'Musu, ka ho khetholoha Mohlomphehi Letona le khabane la Thuto le Koetliso Dr. Mahali Phamotse le Mohlomphehi Motlatsi oa Letona la Temo le Kanetso ea Lijo Mme Mamosa Molapo, ba teng ka hare ho rona kajeno;

Matlo a mabeli a Paramente; 'me ka Ntlong ea Senate ke qolle Morena oa ka oa Sehloho oa Rothe, Masite, Seroeng, Letšeng, Kolo Ha Mohlalefi le Thaba-Tseka: Morena Bereng Bereng ea teng koano; ha ka Ntlong ea Bakhethoa teng ke rata ho qolla

Mohlomphehi `Manthabiseng Phohleli Mokhethoa oa lebatooa lena la Rothe, ea teng koano le ena;

Mohlomphehi `Musi oa Setereke sena sa Maseru, Major General Samuel Makoro, ea teng koano kajeno;

Morena oa sebaka sena seo re hatileng mobu oa sona Morena Neo Bereng le marena ohle a tšoarisaneng puso le ona;

Bahlomphehi ba K'hanselara;

Li ofisiri tse kholo tsa `Musu tse teng koano;

Litho tsa boto ea tsamaiso ea LRA le bookameli bohle le basebetsi ba LRA;

Botsamaisi ba sekolo sena sa mathomo sa Likoabing;

Litsi tsa khaso le bophatlalatsi ba litaba;

Bamemuoahle bohle ba teng koano;

Bana baka ba sekolo;

BoMme le BoNtate;

Mosotho o ba a opile khomo lenaka ha are "thuto ke leseli la bophelo, ke lefa le sa boleng, ebile hape eona thuto eo, ke senotlolo sa bophelo". Ke rata ke be ke hahelle holima mantsoe ana a bohlahe, ka hore thuto e boetse hape ke t`siea ea bohlokoa kholisong le ntlafatsong ea moruo le maphelo a baahi ba naha efe kapa efe lefatseng. Boramatsete, pele ba khetha na ba tsetele naheng ea rona ea Lesotho kapa che, ba sheba na re na le

batho ba rutehileng, ba nang le mahlale a hlokehang ho etsa mosebetsi oo ba batlang ho o etsa ka hare ho naha ea rona. Eleng hore, haeba re sena batho ba joalo, eba ho na le naha e nngoe eo re qothisanang lehlokoa le eona ntlheng ea ho bitsa bo ramatsete, joale naha eo eona ena le batho ba joalo, ramatsete a ka iphumana a fetetse naheng eo, a ilo fana ka mesebetsi teng, rona re sala re ntse re sena eona mesebetsi eo.

Ho a utloahala hee hore likolo, eleng tsona liliba tsa thuto, ke lintho tsa bohlokoa-hlokoa haholo maphelong a rona. Ntho e nngoe le engoe eo re nang le eona ea ntlafatso matsatsing ana, mohloli oa eona ha o ka shalimisisa, u tla fumana hore ke thuto. Eleng hore ha re aha likolo, re ahela Lesotho bokamoso bo chabileng.

Re le Setsi sa Pokello ea Lekhetho, e hlile ke maikemisetso a rona ho se "itheke moroalo" ha ho tluoa litabeng tsa ntlafatso ea maphelo a Basotho. Re ikemeselitse hore ka hohle ka moo re ka khonang, ekaba ke rona ka bomong, kapa ka ho kopanela le ba bang bao re shebelang mmoho litabeng tsa mofuta ona, re itahlele ka setotsoana kholisong le ntlafatsong ea maphelo a Basotho. Ha maphelo a Basotho a ntlafetse, ba khona ho kenya letsoho le bona ka ho lefa lekhetho ka litsela tsohle tse fapaneng tseo le lefuoang ka tsona, kahoo ba ba le seabo hore Lesotho e be naha eo kaofela re ka ratang ho phela ho eona. Ha u talimisisa, u tla elelloa hee ke hona hore, sepheo-pheo le morero o moholo oa Setsi sa Pokello ea Lekhetho, LRA, ehlile ke ntlafatso

ea maphelo a Basotho, hobane likhafa tseo re li bokellang, ke tsona tse thusang 'Musu ho aba litšebeletso le ho holisa moruo oa Lesotho, molemong oa bophelo bo botle, bo monate ho Basotho bohle.

E ntse ele ho ntsetsa pele ona morero oo oa 'Musu oa ntlafatso ea maphelo, Setsi se qetelletse se eba le leano leo ka lona se ka thusang litabeng tsa thuto, litabeng tsa lipapali, eka sita le ho thusetsa haholo batho ba maqakabetsing ka tsela ea ho sebetsa le bona ho ba etsetsa mekhoha ea boipheliso. Ke ka hona re leng mona letsatsing lena.

Ka morao ho hore TV Lesotho e bontše masisa-pelo a sekolo sena, basebetsi mmoho le nna ba ile ba eba lentsoe-leng, hore re lokela ho kenya letsoho re thusetse ho bona hore ho aheloa bana le matichere matloana a boithuso, le ho eketsoa hoa liphaphosi tsa thutelo, ele hore re bebofalletse mesuoe ho etsa mosebetsi oa bona oa ho otlala bana. Ka nnete ke leboha le ho lebohela TV Lesotho ka khatiso eo ea letsatsi leo, hobane ke ka eona feela re tsebileng ho fumana hore ho na le bothata bona. Ho nna, hona ke sesupo sa hore bophatlalatsi, boa thusana ntlafatsong ea maphelo a Basotho, haholo ha bo etsoa ka sona sepheo seo sa ho aha le ho fetolela maphelo botleng.

Ke utloa basebetsi mmoho le bona ke ba khotse moea litabeng tsena. Ba-haeso, ke ka lona re leng mona letsatsing lena. Le ile la

bona hore ha hoa lekana ho phutha matsoho litaba li le boemong bona, mme la hoeletsa le le moho, ka lentsoe-leng, hore uele ha re thusetseng, me ha feela haeba joalo. Ke leboha ho menahane ke hona ka boikitlahetso boo ba lona ho thuseng ha sechaba sa habo rona, hobane nnete ea molimo ke hore, ke sona sechaba sena, se re lefang meputso ea rona ka likhafa tsa sona. Hore re re rea leboha ka ho thusetsa mona Rothe ka ntlafatso ea sekolo kajeno, ke ho fana ka lefa le sa boleng, ho bana bohle ba tla feta le ho rutoa mona.

Ke mpe ke fere polelo ena eaka ka ho ipeletsa hle ho lona sechaba sa heso, sa sebaka sena. Ke mpe ke re "raka la ho fuoa, ha le ke le be le khono hle". Thepa ena e tlang ho nehelanoa ho lona kajeno, le e nke ele ea lona eseng ea LRA. Le e baballe, e tla le tsoela mosola. Le seke la lumella batho ba mona ba sa rateng lintho tse ntle ho tla le senyetsa le ho lekhutlisetsa moo le neng le teng maobane. Kea le lebohela hle, le ho leboha ka kamohelo e mofuthu eo le ileng la re fa eona ha re kokota, re re na re ka thusanang joang ho namola boemong bona bo teng, etsoe hlahahlela le lla ka le leng.

Ha ke riatso, ke mpe ke re kea leboha le hona ho le lakaletsa hore mpho ena e baballehe.

khotso